



FASNACHT 2024

## EWIGI OPTI-MISCHE

Sujet

### OONI MÜNZ UND OONI NOOTE: NUR NO KARTE IN DE PFOOTE

Als Kinder hämmer gleert, e jeede Batze, wo iibrig isch, und sygs au nur e bitz, soorgfältig hyffele und zämmegratze, und noochhäär ynestegge in dä Schlitz am Rugge vo dr Spaarsau, zem si fille mit Fimferli, Fimflyyber, Santym au, bis dass si voll isch und me si ka kille, die gueti, alti, diggi Hartgäld-Sau. So hämmer gleert, e jeeder Rappe z eere, im Hoosesagg oder im Boortmenee, und jeede Frangge vor em Bruuche z keere. Gäld het men aaglängt, und no kenne gsee.

Das isch verbyy! Jetz wänn is doch die Niete und Haifisch us em Bange-Mänätschmänt s Metall- und Noote-Gäld total verbiete; dr Mäss- und Gettibatze au emänd.

E Front-Desk- Assistänt, e virtuelle, ergläärt aim online jetz die neii Wält, wo uffgruumt het mit Hyffele und Zelle vom bleede alte, so genannte, Gäld.

E Kärtli längt. E Nimmerli - und pronto zaalsch iiberaal und aifach uff Kredit, und gsesch und waisch nit, ob ächt uff dym Konto no ebbis isch, oder villicht au nit.

E Kärtli syg bequääm, disgreet

und praktisch, ergläärt dy Bangg diir frintlig, siess und knapp

und hoolt dermit ganz elegant und taktisch alles, wo si vo diir will wisse, ab. Wenn goosch go raise, fliege, dringge, ässe?

Wo drybsch dy ummenander Daag und Nacht?

Privat und Hindenumme kasch vergässe.

Dy ganzes Lääbe wird jetz iberwacht.

Und Du bruuchsch hundert Ziffere und

Zaiche, villicht e Duumenabdrugg und e Code.

Und schliesslig muesch die rächte Gnepf

no braiche, bevor s System di denn au yneloot.

Me däät die Kärtli wältwyt honoriere; Soo dailt aim jeedi Bange-Wärbig mit.

Jetz gang emol bim Baanhoof go brobiere,

wie me de Junkies dert e Batze git

und wo men an dr Freie Strooss am Egge

im ene soone Stroosse-Musikant

e Karte irgendwoo ka yyne stegge.

Und gnau so goots dr am Marroni-Stand.

D Kolläggt in dr Kirche het me immer

am Sunntig noch dr Minschterpreedigt

geschetzt.

Vergiss das! Denn au doo wirds als wie

schlimmer:

Dr Wääg zer Wooltaat isch drum nit vernetzt.

Noch em Konzäart- oder Theaater-Oobe

luegsch au no zimmlig rootloos us dr Wesch,

wenn d fir die Daame an dr Garderoobe

fir s Dringg-Gäld numme soon e Karte hesch.

Kurzum: I kennt mi jo no arrangiere.

Wenn s sy muess, schiggti mi halt dryy,

und liess mi contre-coeur sogar mutiere,

zem Plastik-Kartograaf, wie s hit muess sy.

Nadyyrlig nur, sofäärn s emänd däät groote,

dass irgendwoo en Automaat wurd stoo,

wo me nit numme grad die groosse Noote,

nai, au no oordlig Münz, kennt uuseloo.

Me bsuecht dr ganz Ladäärne-Schatz

am Zyschtig uff em Minschterblatz.

Dr Sunntig no dr Faasnacht (25. Hoornig = Februar)

sottscht notiere

zem noonemoole d Faasnacht zelebriere:

Denn ka me nämmlig ab de Fimfi zoobe

e «Zeedel-Lääsede» im Loonhoof oobe

im BaseldytscheBiini-Käller gniesse.

Au Dyy Bsuech däät me bstimmt no seer bigriesse.

Pfyffer- und Drummlerschuel vo de Glaine Opti-Mischte

Zem frie ins Faasnachtsläabe starte

hänn mir e stolzi Jungi Garde.

Deert leert me Drummle oder Pfyffe

und Baschtle oder Väärsli schlyffe

Mer hänn dr Plausch. S git vyyl zem Lache.

Kumm doch mit uns go Faasnacht mache!

Debby Cron, Obfrau vo de Glaine Opti-Mischte

glaini@opti-mischte.ch